

## **Ama' yej kijekuiloj Santiago**

### *Ama' yej kijekuiloj Santiago*

<sup>1</sup> Nej niSantiago, yej nikchijto' ken kineki Dios iwán toTeko Jesucristo, nimitsaludarowaj amonochin yej ankitokaj Dios yej ampapayintokej noyan ipan inin tajli.

### *Dios tenextiliá te matikchiwakan*

<sup>2</sup> Nokniwan, amejemen xipoxpakikan kua' kuajkuantas wetzi amoyakapan. <sup>3</sup> Puej ankimátija siga ayá' ankikajtewaj iga anmoconfiarowaj ipan Dios, máj anmomachtiaj iga ankijyowiáj yej wetzi amoyakapan. <sup>4</sup> E' xikmejla'ijyowikan iga manesi iga anye'nemij iwán anye'tajlantokej iwán amo te mamitzpolokan.

<sup>5</sup> Siga agaj de amejemen ayá' kimati te kichiwa, makitajtanili Dios, iwán Dios kinextilij, puej yéj tenextiliá nochi yej tikmatisnekij iwán ayá' teajajwa. <sup>6</sup> E' kua' kitajtani, mamocfiarojto iga Dios kimakas, amo makijto iga ayá' kimakas, iga yej ijkón kichiwa, ken tikita maréjal yej nijnijiga kiwiga ejeka'. <sup>7</sup> Yej ijkón kichiwa, amo makejlan toTeko yawi kimakati tejté. <sup>8</sup> Yej ayá' sesan iyalmaj, nijnijiga yawi.

<sup>9</sup> Siga se toknin ayá' motapialiá, mapaki iga Dios kiweyimatis. <sup>10</sup> Iwán yej motapialiá mapaki kua' moalimpamati. Porque yej motapialiá ken

tikita ixochiyo kochki', iga panówasan. <sup>11</sup> Kuá' kisa tónatí' iwán tadotonitiá, kochki' wáki, iwán ixochiyo xini, iwán imonsajyo ómpaya tamí'. Ijkón no yej motapialíá mopoipolowa kuá' kejlanto' iga máj matatani.

*Matikijowikan inochi yej teyolmiktia*

<sup>12</sup> Pakto' yej kiyowia inochi yej kiyolmiktijto', iga kuá' pánoja, Dios kimakas yej pox yekti iwán pox mōnsajti' iga onos nochipa wan Dios, ijkón ken Dios kijlij nochi yej kichokiliáj. <sup>13</sup> Kuá' agaj kichwasneki yej ayekti, amo makijto iga Dios nemi kichiwiliá, iga Dios ayá' kichwasneki yej ayekti, niga agaj kichiwaltia yej ayekti. <sup>14</sup> Ayéj ijkón, kuá' se kichwasneki yej ayekti, yéjsan mochiwiliá iga kiyoltilana yej iyalmaj kineki makichwa iga kejlanto' yej ayekti. <sup>15</sup> Ipan inón yej ayekti yej se kejlanto' ipan iyalmaj pewa iga se kichwa yej ayekti, iwán kuá' se kichijto' yej ayekti, nochipa miktos.

<sup>16</sup> Nokniwan yej nimitzpoxchokiliáj, amo ximokajkawakan; <sup>17</sup> nochi yej temakaj yej yekti iwán mōnsajti', inón temaka Dios yej kichij nochi yej xota ipan cielo. Dios nochipa ono' iwán ayí' mopata, niga kichwa iga matonokan kan takomichkan. <sup>18</sup> Iga itájtōl Dios sej tinacerojkej iga matonokan ken áchtopa ipilowan iga ijkón yéj kine'.

*Matikchiwakan ken kijtowa itájtōl Dios*

<sup>19</sup> Inón iga nokniwan, sejsé de amejemen xikakikan yej moknin mitzijlijnekij, amo nimanin xitajtōkan iwán amo nimanin xikue-siwikan, <sup>20</sup> porque yej kuesiwi, ayá' kichwa

ken Dios kineki. <sup>21</sup> Inón iga xikajtewakan nochi yej ayekti yej inán mopoxchijto' iwán ximoalimpamatikan iga xikye'kakikan tájtol yej mitznextilijkej yej wel mitzmanawiskej.

<sup>22</sup> E' ayéj iga san xikakikan itájtol Dios, sino que xikchiwakan, puej siga ayá' ankichiwaj san petz anmokajkayajtoskej. <sup>23</sup> Yej san kipetzkaki itájtol Dios, iwán ayá' kichiwa, ken tikita se taga' yej kita ixaya' ipan espejo. <sup>24</sup> Motachiliá igánajsan, e' kuá' yáwiya, kelkawa ken iga tachá. <sup>25</sup> Majwa' siga amejemen ankiye'tachiliáj itájtol Dios iwán nochipa ankichiwaj ken kijtowa, ampaktoskej nochipa noyan kan annemij. Porque itájtol Dios pox yekti wan texitoma kan ken tilpitokej iga tikchijtokej yej ayekti. E' yej ayá' kelkawa yej kikaki, sino que kejlanto' ipan inón ley yej yekti, inón ley yej texitoma, iwán nochipa kichiwa ken tatekimaka inón ley, paktos iga ijkón kichijos.

<sup>26</sup> Siga agaj kijtowa iga kitoka Dios, iwán ayá' motentilana, mokajkayawa igánajsan iwán baldejsan iga kijtowa iga kitoka Dios. <sup>27</sup> Yej kimela'toka iyojwi Dios iwán ye'nemi iyixtaj toTeko, inín kichiwa: kipalewiá iknomej, iwán viudajmej kuá' tayokoxtokej, no kikajtewa kua-jkuantas yej ayekti yej mochiwa ipan inín tajli.

## 2

### *Amo sesan matikye'itakan*

<sup>1</sup> Nokniwan yej anmoconfiarowaj ipan toTeko Jesucristo yej nochi wel kichiwa, amo sesan xikye'itakan. <sup>2</sup> Porque siga kan anmonechkowaj

kalaki se taga' yej kiwajliga anillo de oro ipan imájpil, iwán kakijtiwí' ye'tzótzol, iwán kalaki no se yej ayá' motapialiá yej kakijtiwí' tzotzolsósol, <sup>3</sup> iwán máj anki-omemawíaj yej ye'taajakijto' iwán ankijliskej: "Tejwa' yekti iga nij ximotoali", iwán yej ayá' motapialiá ankijliskej: "Tejwa' ómpao' xejkato o ximotoali nigaj talpan." <sup>4</sup> Ijkonwa' nesí iga ayá' nochi ankiye'itaj iwán ayompa antajuzgarowaj.

<sup>5</sup> Nokniwan ta' xikakikan: Dios kitapejpen yej ayá' motapialiáj ipan inín tajli iga mamonconfiarokan ipan yéj, iga maonokan kan yéj reinarowa ken yéj kijtoj iga ye'onoskej yej kichokiliáj. <sup>6</sup> E' amejemen ankipinajtiáj yej ayá' motapialiáj. ¿Ix ayejtaj yej motapialiáj in yej mitzkuijkuiliáj yej amotatki iwán mitzwawatat-zowaj iga mitzwigaj itenoy yej mandarowaj? <sup>7</sup> ¿Ix ayejtaj yejemej yej maltajtowaj iga imonsajtoka' toTeko yej ankitenewiáj?

<sup>8</sup> Amejemen siga melá' iga ankichiwaj yej iley Dios, kenya nokta kijtowa kan ijkuijto': "Xikchokili moknin kensan tej timochokiliá", ankichiwaj yej yekti. <sup>9</sup> E' siga ankinékijsan yej ankiye'itaj, iga ijkón ankichiwaj yej ayekti iwán mitzjuzgarowaj iley toDios. <sup>10</sup> Iwán siga se kichíwa nochi ken kijtowa la ley, e' siga kikajtewa se, kenkuá' akichij nisé. Iwán siga se kichíwa nochi ken kijtowa la ley, iwán kikajtewa se, iga itechko inón kiknochiwaskej. Iwán siga se kichíwa nochi ken kijtowa la ley, e' kikajtewa se, kiknochiwaskej iga ken kuá' nochi kikajtej. <sup>11</sup> Porque Dios kijtoj: "Amo

ximoteka w̄an yej ayá' íw̄an tinamiktito'", kijtoj n̄o: "Amo xitamikti", iw̄an siga ayá' moteka w̄an yej ayá' íw̄an namiktito', e' tamiktiá, kichija yej ayekti. <sup>12</sup> Dios yawi mitzjuzgarotij iga inón ley yej texitomaki, ijkón amejemen xitajtokan iw̄an xinemikan iga ankimatij iga mitzjuzgaroskej. <sup>13</sup> Yej ayá' tachokiliá, ayá' n̄o yawij kichokilitij kuá' yawij kijuzgarotij; e' yej ta-ikneliá, onkisas kuá' Dios tajuzgaroj.

*Ígasan iga se moconfiarowa e' akichiwa nité*

<sup>14</sup> Nokniwan, ¿te motaniliá siga se kijtowa iga moconfiarowa, e' ayá' kichiwa yej yekti? ¿Ix wel momanawij iga moconfiarówasan? <sup>15</sup> Ken matikijtokan, siga agaj ayá' kipiá itzótzol niga te kikua; <sup>16</sup> siga se de amejemen kijlij: "Xiyeyawij; ximotaajaki iw̄an xitakua", e' ayá' kimaka yej kineki; ¿ix kipalewij? <sup>17</sup> Ijkón n̄o yej moconfiarowa, siga ayá' nesi iga kichiwa yej yekti, inonwa' ígasan iga moconfiarowa iga kenkuá' mikto'.

<sup>18</sup> E' agaj kijtoj: "Tej timoconfiarowa ipan Dios iw̄an nej nikchiwa yej Diospa kineki." Siga ayá' tikchiwa ken Dios kineki, anesi iga timoconfiarowa, e' siga nikchiwa ken Dios kineki, kena nesi iga nimoconfiarowa ipan yéj. <sup>19</sup> Tej ticredowa iga Dios sesan, iw̄an iga ijkón ticredowa tikchiwa yej yekti, e' malespiritomej n̄o kimatij iga Dios ono' iw̄an kuekuechkaj iga majmawij. <sup>20</sup> Amo xipachtol, ¿ix atikmati siga se moconfiarowa w̄an ayá' kichiwa ken kineki Dios, inón ígasan iga moconfiarowa? <sup>21</sup> Dios kiyey'ita' Abraham yej to-ikyapatajwéj iga yej kichij, kuá'

kimiktiaya Isaac yej ipiltzın iga iyofrendaj Dios. <sup>22</sup> Ankitaj iga Abraham moconfiaroj ipan Dios iga kinextij ipan yej kichij, iwán iga kichij ken kineki Dios neşi' iga momela'confiaroj ipan toTeko <sup>23</sup> Ijkón mochij ken kijtowa itájtól Dios kan kijtowa: "Abraham moconfiaroj ipan Dios iwán iga moconfiaroj, Dios kiyē'ita'." Iwán Abraham mochij iyamigoj Dios.

<sup>24</sup> Ankitaj amejemen iga Dios nō komemawía inón yej kichıwa yej yekti, ayá' iga mopetzconfiarowa. <sup>25</sup> Ijkón nō kichij Rahab, se siwa' yej najnamolnemiá; Dios kiyē'ita' iga kichij yej yekti, iga ki-omemawij yej tapipiatoj iwán kipalewıkej iga kojmakakej ipan se' ojtı. <sup>26</sup> Ijkón ken se cuerpo yej ayá' kipiá iyespıritoj, inonwa' mikto', ijkonsan nō yej moconfiarowa, yej ayá' kichıwa yej yekti, inonwa' kenkuá' mikto'.

### 3

#### *Tolenguaj*

<sup>1</sup> Nokniwan, amo amonochın xitamachtijnekikan, ankimátija iga yej titamachtıaj, Dios máj yawı tejuzgarotij. <sup>2</sup> Tonochın tikchıwaj mia' yej ayekti; e' siga agaj ayá' namoltajtowa, inón ye'nemi iwán ayá' kichıwa yej ayekti ken kitajtani iyalmaj. <sup>3</sup> Kua' kawayoj tiktaliliáj freno iga matecredo, welja tikuıgaj kan tejemej tiknekij. <sup>4</sup> Ta'ki' xikitakan, akal nō malej iga wejweyi iwán kitopewa yej pox recio ejeka', e' yej kinejnentiá wel kiwıga kan kineki iga se tepostzın. <sup>5</sup> Ijkonsan nō tolenguaj; inón nō alımpatzın, e' wel kijtowa kuajkuantas, ken

tikita se titzin yej wel kitatiá weyi akawalyoj. <sup>6</sup> Tolenguaj ken tikita ti'ti iwán wel kijtowa komati yej ajayekti iwán temopa toseman, iwán Tzitzimi' kichijto' iga tolenguaj ken kuá' wewelkato', iwán wel tewiga kan ayí' sewi ti'ti.

<sup>7</sup> Wel tikmansojtiliáj nochi anímal, totomej, kowamej, iwán yej momati lamarijti'; <sup>8</sup> e' ayagaj wel motentilana. Tolenguaj ayagaj wel kimansojtiliá iwán kipiá ken tikita veneno yej tamiktiá. <sup>9</sup> Iga tolenguaj tikweyimatiltiáj to-Taj Dios iwán tikmalijliáj toknimej yej Dios kichij kensan yéj. <sup>10</sup> Ipan sansé toten kisa ye'tájtól iwán yej ayekti. Nokniwan, amo ijkón matikchiwakán. <sup>11</sup> ¿Ix wel ipan se atzontekon kisa yeká' iwán chichiká'? <sup>12</sup> Nokniwan, ¿ix ipan amakuawi' wel ono nantzín, o ipan xoxokomeka' wel moteki itakilka amakuawi'?\* Nq ipan se atzontekon awel kisa yeká' iwán yej poyé'.

### *Yej wel kentenderowaj ken Dios kineki*

<sup>13</sup> Siga agaj de amejemen kixmati itájtól Dios iwán nochi kentenderowa, manesi iga ye'nemi iwán mamoałimpamati. <sup>14</sup> E' siga amejemen anta-ixítajo' iwán ankitemowaj iga amejémejsan xiye'onokán, entonces amo ximoweyimatikan iga ankixmatij itájtól Dios, ijkón ayá' nemi ankichiwaj yej yekti. <sup>15</sup> Porque inqmpa tamatilis ayá' wı' de Dios, sino que de inın tajli, de taga' iwán de tzitzimi'. <sup>16</sup> Kan

---

\* **3:12** 3:12 "Amakuawi" achi ken "higuerajkuawi". Xikita glosario "Higo". "Nantzín", español "aceitunas" yej itakilka kuawi' yej itoká' olivo. Xikita glosario "Olivo".

ta-ixitalo iwán kan kinekij nochi iga yejémejsan, ompa ayá' tawelonolo' iwán ompa mochijto' nochi yej ayekti. <sup>17</sup> E' yej wel kentenderowaj ken Dios kineki, ye'nemij iwán ayá' takuejkuesowaj; iwán pox te-ijiknimej, iwán ye'tajlantokej. Iwán ta-ikneliáj iwán kichiwaj yej yekti iwán ayá' takajkawaj. <sup>18</sup> Yej kinekij iga maonolo tamelá kimopaj sekin iga maonokan tamelá iga maye'nemikan.

## 4

### *Amo matiktokakan yej ayompa nemij*

<sup>1</sup> ¿Ankimatij te íga anmomagaj iwán anmokuejkuesowaj? Inón kisa ipan amoalmaj kan ono' kuajkuantas yej mitzyoltilanaj iga xikchiwakan yej ayekti. <sup>2</sup> Ankipiasnekij tejté iwán como awel ankipiáj, antamiktiáj, anmomagaj iwán anmokuejkuesowaj iga anta-ixitaj. Awel ankipiáj yej ankinekij iga ayá' ankitajtaniliáj Dios. <sup>3</sup> Iwán siga ankitajtaniliáj Dios, ayá' mitzmakaj iga ayompa ankitajtaniliáj iga ankinekij xiknamoltamikan. <sup>4</sup> ¡Amejemen yej ayompa annemij! ¿Ix ayá' ankimatij iga yej kiyé'ita yej ayompa mochíwa ipan inín tajli, Dios kijiya inón? Yej kichíwasneki yej ayompa mochíwa ipan inín tajli, kichíwa iga Dios maki-jiya. <sup>5</sup> Inón iga itájtol Dios kijtowa: “IyEspíritoj Dios yej ono' topan tepoxchokiliá iwán akineki se' matiktokakan.” <sup>6</sup> E' Dios máj tepalewiá iga tepoxchokiliá; itájtol Dios kijtowa: “Dios ayá' kipalewiá yej moweyimatij, e' kikneliá yej moalimpamatij.” <sup>7</sup> Xikchiwakan yej Dios kineki



iwán amo xikchiwakan ken kineki Tzitzimi' iwán yéj mitzchollowiliskej. <sup>8</sup> Xikna'techokan Dios iwán yéj mitzna'techoskej. Amejemen yej ankichiwaj yej ayekti ayo' máj xikchiwakan yej ayekti. Amejemen yejki' ankitokasnekij Dios iwán nō ankichiwaj yej ayekti yej mochiwa ipan inín tajli, xiksentalíkansan amoalmaj ipan Dios. <sup>9</sup> Ximoyolyamanakan, xichokakan iga anmomachiliáj iga ankichijtokej yej ayekti. Siga anwetzkatokkej, xichokakan; siga ampaktokej, ximoknomatikan. <sup>10</sup> Ximoalimpamatikan iyixtaj toTeko, iwán yéj yawi mitzweyimatiltitij.

### *Amo xikpopowa moknīn*

<sup>11</sup> Nokniwan amo ximopopowakan. Yej kipopowa iyiknīn, iwán kijuzgarowa iyiknīn, iga ijkón kimalijliá iwán kijuzgarowa iley Dios yej tenextiliá iga matikchokilikān toknīn. Siga tikjuzgarowa la ley, tej ayá' tikchiwa ken kijtowa la ley iga timomachiliá iga máj tiye'nemi. <sup>12</sup> Petz Dios yej temá' iley wel tejuzgarowa, inón yej wel tamanawiá o tapolowa; ¿in tej, tē moteki iga xikjuzgaro se'?

### *Amo matimoweyimatikan*

<sup>13</sup> Inán xikakikan inín, amejemen yej ankij-towaj: “Aman o mosta niatij ipan inepa altepe', ompa nonoskej se año iga nitanamakatoskej iwán niktantoskej tomīn”, <sup>14</sup> iwán niga ankimatij yej mostapa yawi mochiwati. ¿Kéntaj an in tejemej iga tonokej? Ken tikita se apo' yej nesiki iwán imanīn poliwi sej. <sup>15</sup> Ijkinwa' in xikijtokan: “Siga toTeko kineki, tonoskej iwán tikchivaskej inín o inepa.” <sup>16</sup> Welán anmoweyimatij iga

ankijtowaj yej ankichiw<sub>u</sub>waskej, iwán ayek<sub>ti</sub> iga se moweyimati. <sup>17</sup> Yej kimati te iteki yej yek<sub>ti</sub> iwán ayá' kich<sub>i</sub>wa, ayompa kich<sub>i</sub>wa.

## 5

### *Yej motapialiáj wan ayá' ta-ikne<sub>li</sub>áj*

<sup>1</sup> ¡Xikakikan amejemen yej anmotapialiáj! Xichokakan iwán xitzajtzikan iga yawij mitz<sub>i</sub>knochiwatij. <sup>2</sup> Amotomimej poxkatokej; amotzotzolmej kixajxapoyótija chijki. <sup>3</sup> Amo oro iwán amoplataj misotatokej iwán iga misotato', inón mitznex<sub>tis</sub>kej iga anyawij ampoliwitij iwán ken tikita ti'ti yawij mitztat<sub>i</sub>tij. Poxsan ankinechkojkej amotom<sub>i</sub>n inán kuá' na'ya iga Dios yawi tajuzgaroti. <sup>4</sup> Ayá' ankixtajkej yej tekipanojkej ipan amómil iwán toTeko yej nochi wel kich<sub>i</sub>wa kiká' yej yejemej kitajtantokej. Inón tom<sub>i</sub>n yej ayá' ankixtajkej ken kuá' tzajtzi iyix<sub>taj</sub> Dios amoc<sub>on</sub>traj. <sup>5</sup> Iga ipan in<sub>i</sub>n tajli amejemen anye'onoyaj, ankich<sub>i</sub>wayaj yej ankineki<sub>j</sub>, anmochikajtokej ken ganado; iwán yawi asiti kuá' yawij mitzmikt<sub>i</sub>tij.

<sup>6</sup> Amejemen ankijtojkej iga mamikikan yej ayá' kich<sub>i</sub>kej yej ayek<sub>ti</sub> iwán ankimikt<sub>i</sub>kej iwán yejemej awel momanawijkej.

### *Matimixku<sub>i</sub>tikan ipan Job*

<sup>7</sup> Inón iga nokniwan xiktawelchixtokan este kuá' w<sub>i</sub>' toTeko. Ximixku<sub>i</sub>tikan ipan yej tekipanowa ipan mijli, yej kitawelchá este mamoch<sub>i</sub>wa yej kitoga', iwán kitawelchá iga mawetzi tiawa'. <sup>8</sup> Amejemen no xiktawelchakan iwán amo ximosemakakan, iga ayo' wejka

iga wj' toTeko. <sup>9</sup> Nokniwan amo ximosepa-  
ntejtewikan, iga amo mamitzjuzgarokan, iga  
Dios yej tajuzgarowa wj'nekiya. <sup>10</sup> Nokniwan,  
ximixkuitikan ipan profetajmej\* yej kipojkej  
itajtol toTeko iga kijyowijkej kuq' kiknochijkej.  
<sup>11</sup> Puej tejemen tikye'itaj yej kijyowiáj kuq' ki-  
knochiwaj. Amejemen ankikakikeja kén iga Job  
nochi kijyowij, iwán ankimatij kén iga máj máj  
toTeko kipalewij, iga toTeko pox tachokiliá iwán  
ta-ikneliá.

### *Ken iga matinemikan*

<sup>12</sup> Nokniwan, amo xikijtokan “kitzto' Paj”,  
niga “kitzto' cielo”, niga “kitzto' tajli”, iwán  
nité nokta. Kuq' ankijtowaj “kena” ijkón  
mamochiwa; kuq' ankijtowaj iga “ayá” ijkón  
mamochiwa, iga Dios amo mamitzjuzgarokan.

<sup>13</sup> Siga agaj de amejemen nemi kiknochiwaj,  
matajto wan Dios. Siga agaj pakto', makitakuikili  
Dios. <sup>14</sup> Siga agaj wetito', makinotza  
ancianojmej† yej monechkowaj tiopan iga  
maoradokan iga yéj, iwán ipan itoka' toTeko  
makitalilikan aceite. <sup>15</sup> Iwán kuq' antajtowaj  
wan Dios, ximoconfiarokan ipan yéj, toTeko  
mitztajtolkakiskej iwán yej wetito' yektiás; iwán  
siga kichij yej ayekti Dios yawi kelkawiliti.  
<sup>16</sup> Inón iga ximoténxitomakan sewo' iwán se' yej  
ankichijkej yej ayekti, iwán sejsé de amejemen  
xiktajtanilikan Dios iga makachitalti toknimej.  
Kuq' se yej ye'nemi tajtowa iwán Dios, Dios wel  
poxsan kichiwa yej quitajtaniliá. <sup>17</sup> Profeta yej

\* **5:10** 5:10 Xikita glosario “Profeta”. † **5:14** 5:14 Xikita  
glosario “Anciano”.

itoká' Elías taga' katka kensan tejemen, iwán kuá' kitajtanilij Dios iga amo mawetzi tiawa', ayá' wetzi' ipan tajli ipan eyi año wán tajko. <sup>18</sup> Kuá' sej kitajtanilij Dios, wetzi' sej tiawa' iwán ipan tajli poxsan mochij yej motoga'.

<sup>19</sup> Nokniwán, siga agaj de amejemen mopolowa iga kikajtewa iyojwi Dios, iwán sewo' sej kiyē'ojkuiltiá, <sup>20</sup> xikmatikan amejemen siga agaj makiye'ojkuilti yej ayompa nemi, kimanawia iga mikiá iwán kichiwás iga toTēko wel kelkawiliá mia' yej kichij yej ayēkti.

**Itájtōl toTēko ipan mela'tájtōl  
Nahuatl, Isthmus-Mecayapan: Itájtōl toTēko ipan  
mela'tájtōl New Testament**

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

8d5b6a33-8846-5c0f-ae8f-62c94f894f7b